

Na osnovu člana 60. stav (1) tačka d) Zakona o visokom obrazovanju („Službene novine Tuzlanskog kantona“, broj: 7/16, 10/16, 5/17, 15/17 i 15/19) i člana 52. stav (1) tačka b) Statuta Univerziteta u Tuzli, broj: 03-730-1/17 od 03.02.2017. godine, Senat Univerziteta u Tuzli na sjednici održanoj 29.05.2020. godine, utvrdio je

PRAVILNIK
O TREĆEM CIKLUSU - DOKTORSKOM STUDIJU NA UNIVERZITETU U TUZLI
(Prečišćeni tekst)

I OPĆE ODREDBE

Član 1.

Pravilnikom o trećem ciklusu - doktorskom studiju na Univerzitetu u Tuzli (u daljem tekstu: Pravilnik), uređuje se organizacija i izvođenje doktorskog studija, upis na doktorski studij, način provođenja ispita i istraživačkog rada, postupak prijave, ocjene i odbrane doktorske disertacije, kao i druga pitanja od značaja za realizaciju studija za sticanje naučnog stepena doktora nauka/umjetnosti na Univerzitetu u Tuzli (u daljem tekstu: Univerzitet).

Član 2.

Doktorskim studijem smatra se svaki studijski program koji daje pravo na sticanje diplome akademske titule i naučnog stepena doktora nauka ili doktora umjetnosti za određenu oblast, u skladu sa Zakonom, ovim Pravilnikom i Pravilnikom o akademskim i stručnim zvanjima resornog Ministarstva.

II. ORGANIZACIJA TREĆEG CIKLUSA STUDIJA

Član 3.

(1) Doktorski studij organizuju fakulteti/Akademija samostalno, zajednički sa drugim fakultetima ili sa drugim visokoškolskim ustanovama, ili Univerzitet zajednički sa drugim visokoškolskim ustanovama (u daljem tekstu Organizator studija).

(2) Organizator studija organizuje i izvodi doktorski studij iz naučnih/umjetničkih oblasti za koje je Univerzitet akreditovan, te provodi postupak za sticanje akademske titule i naučnog zvanja doktora nauka/umjetnosti iz odgovarajuće oblasti.

(3) Za organizaciju studija iz prethodnog stava, saglasnost daje Senat Univerziteta.

Član 4.

Naučno-nastavno/umjetničko-nastavno vijeće fakulteta/Akademije (u daljem tekstu NNV/UNV Organizatora studija), pokreće inicijativu i utvrđuje prijedlog za organizovanje doktorskog studija koji organizuje fakultet/Akademija, a odgovarajuće Vijeće grupacije za određeni studijski program koji organizuje Univerzitet. Organizator studija

Organizator studija

Član 5.

(1) NNV/UNV Organizatora studija imenuje Vijeće za doktorski studij kao svoje stalno tijelo (u daljem tekstu: Vijeće) za sve studijske programe.

(2) Senat Univerziteta (u daljem tekstu: Senat) za zajednički doktorski studij sa drugim visokoškolskim ustanovama imenuje Vijeće za doktorski studij.

(3) Vijeće za doktorski studij ima 5 (pet) ili 7 (sedam) članova, koje bira NNV/UNV Organizatora studija na period od 4 (četiri) godine, iz reda nastavnika na doktorskom studiju.

- (4) Poslove sekretara Vijeća obavlja sekretar fakulteta/Akademije.
- (5) Predsjedavajući Vijeća je voditelj doktorskog studija kojeg imenuje NNV/UNV Organizatora studija, na prijedlog većine članova Vijeća.
- (6) Vijeće studija rješava sva pitanja koja se odnose na organizaciju i tok studiranja, te predlaže odluke koje donosi Senat odnosno NNV/UNV Organizatora studija, a u vezi su sa studijem (komisije i sl.).
- (7) Vijeće studija počinje sa radom najkasnije 90 dana prije početka nastave.

Član 6.

- (1) Voditelj doktorskog studija iz prethodnog člana se imenuje na period od 4 (četiri) godine.
- (2) Voditelj doktorskog studija obavlja slijedeće poslove: - saziva i predsjedava sjednicama Vijeća doktorskog studija - predlaže prodekanu za nastavu i studentska pitanja Plan realizacije nastave - ostvaruje potrebnu/optimalnu saradnju sa Uredom za nastavu i studentska pitanja Univerziteta - učestvuje u pripremi i realizaciji konkursa za upis kandidata na treći ciklus studija - učestvuje u pripremi sjednica Naučno-nastavnog vijeća Fakulteta - učestvuje u realizaciji odluka Naučno-nastavnog vijeća Fakulteta i Senata koje koje se tiču nastavnog procesa trećeg ciklusa studija - učestvuje u pripremi prijedloga odluka Naučno-nastavnog vijeća Fakulteta o pitanjima trećeg ciklusa studija o kojima konačnu odluku donosi Senat Univerziteta - utvrđuje raspored nastave i ispitnih rokova za studente trećeg ciklusa studija - prati studente trećeg ciklusa studija u realizaciji naučno-istraživačkog rada u pogledu objavljivanja naučnih radova - učestvuje u pripremi Odluka za priznavanje ECTS bodova upisanim kandidatima koji su stekli naučni stepen magistra nauka - predlaže dekanu visine školarine trećeg ciklusa studija - obavlja i druge poslove iz djelokruga svog rada u skladu sa drugim oštım aktima Univerziteta u Tuzli po nalogu dekana.

Organizacija i izvođenje studija

Član 7.

- (1) Doktorski studij se organizuje i izvodi kao redovni, vanredni ili studij učenjem na daljinu, ili kombinovanjem ova tri načina studiranja.
- (2) Doktorski studij se sastoji iz:
 1. Izbora naučne/umjetničke oblasti u okviru koje će se raditi doktorska disertacija i izbora mentora;
 2. Definisivanja studijskog programa, oblasti, podoblasti, discipline;
 3. Pohađanja nastave i praćenje vrednovanja rezultata kroz utvrđene provjere znanja;
 4. Prijave i prezentacije izabrane teme, pristupa i naučnog metoda doktorske disertacije/rada;
 5. Naučno-istraživačkog/umjetničkog i praktičnog rada na izradi doktorske disertacije;
 6. Javne odbrane doktorske disertacije;
 7. Objavljivanja dijelova istraživanja u referentnim časopisima.

Član 8.

- (1) Doktorski studij izvodi se po studijskim godinama i semestrima. Studijski program doktorskog studija realizuje se kroz:
 - a) nastavu,
 - b) naučnoistraživački i umjetnički rad,
 - c) izradu i odbranu doktorske disertacije.
- (2) Nastavni proces se izvodi kroz predavanja, seminare, konsultacije, te druge utvrđene oblike nastave.

(3) Nastavnik na trećem ciklusu studija može biti redovni ili vanredni profesor, odnosno docent koji, kao autor ima najmanje jedan naučni rad iz oblasti na kojoj izvodi nastavu, objavljen u časopisu indeksiranom u međunarodnim naučnim bibliografskim bazama (CC, SCI, SCIE, SSCI, AHCI, ERIH, ECON LIT, MathSciNet (Mathematical Reviews)), osim studija umjetnosti.

(4) Po ukazanoj potrebi, nastavnik u nastavi trećeg ciklusa studija može biti redovni/vanredni profesor, odnosno docent koji kao autor ima najmanje tri naučna rada iz oblasti na kojoj izvodi nastavu, objavljena u drugom/im relevantnom/im časopisu/ima.

(5) Odluku o načinu izvođenja nastave koja će se organizovati donosi Vijeće studija.

Struktura studijskog programa

Član 9.

Studijski program doktorskog studija sadrži:

- studijske oblasti, podoblasti i discipline;
- obavezni predmeti;
- izborni predmeti;
- istraživački, terenski i praktični rad;
- uslove upisa na studijski program;
- preduslovi za slušanje i polaganje pojedinih nastavnih predmeta/upis u narednu godinu studija;
- prava kandidata u pogledu rezultata koje su ostvarili tokom sticanja odgovarajućeg zvanja prije uvođenja Bolonjskog sistema trocikličnog studija;
- Listu nastavnika koji izvode nastavu na doktorskome studiju;
- način organizovanja doktorskog studija;
- akademsku titulu, odnosno naučno zvanje koje se stiče završetkom doktorskog studija;
- kompetencije i vještine koje se stiču na doktorskome studiju.

Član 10.

Student je dužan položiti sve ispite i obaviti sve ostale provjere znanja. Vrednovanje rezultata rada tokom studija kroz ECTS bodove.

Vrednovanje rezultata rada tokom studija kroz ECTS bodove

Član 11.

(1) Obim doktorskog studija vrednuje se sa 180 ECTS bodova. Obim studijskog programa iznosi 60 ECTS bodova u jednoj studijskoj godini, odnosno 30 ECTS bodova u jednom semestru.

(2) Svi oblici nastavnog procesa, u skladu sa studijskim programom i nastavnim planom i programom vrjednuju se sa određenim brojem ECTS bodova.

(3) Studijskim programom mogu se utvrditi preduslovi za slušanje i polaganje pojedinih predmeta ili drugih oblika nastavnog procesa.

(4) Ocjenjivanje studenata vrši se neprekidnim praćenjem rada studenta i na osnovu ECTS bodova stečenih izvršavanjem predispositivnih obaveza, te polaganjem ispita, odnosno izvršavanjem i drugih obaveza utvrđenih studijskim programom.

Član 12.

(1) Student koji u toku studijske godine ne ostvari 60 ECTS bodova, može prenijeti u narednu godinu studija 10 ECTS bodova ili najviše dva nastavna predmeta/ekvivalent drugih obaveznih oblika nastavnog procesa, ukoliko su vrjednovani i sa više od 10 ECTS bodova.

(2) Student koji ne ispuni uslov iz prethodnog stava, u obnovljenoj godini studija izvršava preostale obaveze, bez obaveze ponovnog pohađanja nastave.

Član 13.

- (1) Nastava doktorskog studija se organizuje u skladu sa programom doktorskog studija.
- (2) Naučno-nastavno/Umjetničko-nastavno vijeće fakulteta/Akademije na početku akademske godine određuje datum početka nastave, vremenski plan realizacije nastave i ispita te period upisa i ovjere semestra.

Član 14.

- (1) Doktorska disertacija se vrednuje u rasponu od 60 do 90 ECTS bodova.
- (2) Istraživački rad studenta vrednuje se u ECTS bodovima, što se bliže uređuje planom i programom studija.

Trajanje doktorskog studija

Član 15.

- (1) Treći ciklus studija- Doktorski studij traje tri studijske godine, odnosno šest semestara i vrednuje se sa 180 ECTS bodova.
- (2) Student trećeg ciklusa studija, u skladu sa organizacijom studija utvrđenom ovim Pravilnikom i upisanim studijskim programom u obavezi je okončati doktorski studij i odbraniti doktorski rad u roku od šest godina, računajući od akademske godine u kojoj je upisan na studij trećeg ciklusa na Univerzitetu.
- (3) Izuzetno, rok iz stava (2) ovog člana, na zahtjev kandidata se može produžiti najduže za još jednu akademsku godinu, ako postoje opravdani razlozi za produženje, o čemu odluku donosi naučno-nastavno/umjetničko-nastavno vijeće fakulteta.

III. UPIS NA DOKTORSKI STUDIJ

Član 16.

- (1) Upis na doktorski studij vrši se na osnovu javnog konkursa koji raspisuje Senat na prijedlog NNV/UNV Organizatora studija, odnosno Vijeće grupacije koja je matična za određeni studijski program, za studij koji organizuje Univerzitet.
- (2) Konkurs se objavljuje u dnevnom listu koji izlazi u BiH i na WEB stranici Univerziteta.
- (3) Konkurs za upis kandidata na doktorski studij obavezno sadrži podatke o:
 - oblastima za koje se organizuje studij;
 - broj studenata za upis po oblastima studija;
 - uvjetima koje mora ispunjavati kandidat;
 - minimalnom broju kandidata za koje će se organizovati studij na odgovarajućoj oblasti;
 - spisak potrebne dokumentacije o ispunjavanju uvjeta za upis;
 - rokove za upis;
 - finansijske pretpostavke za realizaciju studija.

Član 17.

- (1) Na konkurs se mogu prijaviti kandidati koji su stekli diplomu drugog ciklusa studija ili ekvivalenta (akademskeg zvanja magistra) iz odgovarajuće oblasti nauka/umjetnosti.
- (2) Kandidati koji konkurišu na studij iz umjetnosti moraju imati uspješnu umjetničku praksu, odnosno referentne radove, što bliže utvrđuje UNV-e Akademije.
- (3) Izuzetno od prethodnog stava, na konkurs doktorskog studija iz oblasti biomedicinskih i zdravstvenih nauka mogu se prijaviti kandidati koji su stekli diplomu integrisanog studija prvog i drugog ciklusa, odnosno dodiplomskog studija iz odgovarajuće oblasti nauka, sa

ostvarenih najmanje 300 ECTS kredita, što se bliže utvrđuje nastavnim programom doktorskog studija.

Član 18.

Kandidatima za upis koji su stekli naučno zvanje magistra prije uvođenja Bolonjskog sistema studiranja iz oblasti koje su relevantne za oblasti iz kojih se organizuje doktorski studij priznaje se odgovarajući broj ECTS bodova, u skladu sa Zakonom i studijskim programom.

Član 19.

Kandidat za upis dužan je podnijeti prijavu i priložiti dokumente predviđene konkursom. U slučaju da je broj prijavljenih kandidata veći od broja određenog u konkursu, izbor kandidata koji su stekli pravo za upis vrši se na osnovu rezultata postignutih tokom ranijeg studija koji je uvjet za upis i na osnovu naučnih/umjetničkih radova, ako su oni uvjet za upis, nakon provedenog postupka rangiranja.

Član 20.

(1) Postupak rangiranja provodi Komisija za upis studenata, koju imenuje Vijeće studija iz reda nastavnika studija koji se organizuje.

(2) Prijedlog rang liste dostavlja se NNV/UNV Organizatora studija na konačno usvajanje.

(3) NNV/UNV Organizatora studija dužno je dostaviti konačan izvještaj o rezultatima upisa studenata Senatu Univerziteta.

Član 21.

(1) Rang lista se objavljuje na oglasnoj ploči i WEB stranici Univerziteta i fakulteta/Akademije i ista se dostavlja svim kandidatima koji su učestvovali na konkursu.

(2) Kandidat koji smatra da postupak rangiranja nije pravilno proveden, ima pravo prigovora NNV/UNV Organizatora studija u roku od 48 sati od objavljivanja rang liste na oglasnoj ploči i WEB stranici, kao i pravo na uvid u dokumentaciju drugih kandidata.

(3) Odluka po prigovoru iz stava (3) ovog člana mora se donijeti u roku od 3 dana od podnošenja prigovora. Odluka se saopštava podnosiocu prigovora i objavljuje na oglasnoj ploči i WEB stranici Organizatora studija.

Član 22.

(1) Kandidat je ostvario pravo na upis ukoliko se nalazi na rang listi do broja koji je konkursom predviđen za upis.

(2) Kandidat koji je ostvario pravo na upis, a u predviđenom roku nije izvršio upis, gubi to pravo, a umjesto njega pravo na upis stiže sljedeći kvalifikovani kandidat na rang listi.

Član 23.

Student zaključuje sa Univerzitetom ugovor o studiranju, kojim se bliže utvrđuju njihova međusobna prava i obaveze i visina školarine.

Član 24.

(1) Strani državljani i lica bez državljanstva imaju pravo upisa na doktorski studij pod jednakim uvjetima kao i državljani Bosne i Hercegovine, uz prethodno akademsko priznavanje diplome o prethodno završenom odgovarajućem ciklusu studija.

(2) Lica iz prethodnog stava plaćaju školarinu u visini utvrđenoj odlukom nadležnog organa Univerziteta i Odlukom Vlade Tuzlanskog kantona.

(3) Studenti koji ostvare pravo upisa na treći ciklus studija, a koji su prethodno stekli diplomu naučnog stepena magistra, plaćaju utvrđeni iznos školarine umanjen za procenat utvrđen Odlukom o prihodima i rashodima trećeg ciklusa studija - doktorski studij na fakultetima Univerziteta u Tuzli.

IV. PRIJAVA, OCJENA I ODBRANA DOKTORSKE DISERTACIJE

Postupak prijave, ocjene i odobravanja teme (projekta doktorskog istraživanja)

Član 25.

(1) Postupak prijave doktorskog rada kandidat započinje izradom nacrtu istraživanja za disertaciju u II semestru, a prijava teme se vrši početkom III semestra.

(2) U toku III semestra studija student prijavljuje prijedlog teme doktorske disertacije (projekta). Kandidat pokreće postupak prihvatanja teme doktorskog rada podnošenjem prijave Vijeću studija.

(3) Prijava sadrži:

- opšte podatke o kandidatu, biografiju i popis radova kandidata;
- naslov predložene teme;
- podatke o predloženom mentoru i njegovim kompetencijama;
- obrazloženje teme i očekivani izvorni naučni doprinos predloženog istraživanja;
- izjavu da nije prijavio doktorski rad sa istovjetnom i sličnom temom na drugom studiju Univerziteta, odnosno na drugom Univerzitetu.

Član 26.

(1) Vijeće studija imenuje komisiju od 3 ili 5 članova od kojih je većina iz oblasti iz koje je predložena tema. Jedan od članova komisije, u pravilu je sa drugog univerziteta. Komisija razmatra prihvatljivost prijedloga teme i određuje nastavnika (supervizora) koji je potencijalni mentor, koji će usmjeravati studenta kod pripreme projekta doktorske disertacije. Student je dužan da do početka V semestra izradi i pristupi odbrani projekta.

(2) Projekt se brani pred komisijom iz stava 1. ovog člana. Odbrana projekta je javna.

(3) Odbrana projekta se može organizovati i putem video konferencije ukoliko član(ovi) komisije sa drugog univerziteta ima(ju) prebivalište/boravište izvan Tuzlanskog kantona, a što komisija unosi u zapisnik sa odbrane projekta.

Član 27.

(1) Komisija sačinjava izvještaj o odbrani projekta i dostavlja ga Vijeću studija.

(2) Na osnovu pozitivnog izvještaja komisije i odluke Vijeća studija, student može prijaviti temu doktorske disertacije.

Prijava teme doktorske disertacije

Član 28.

(1) Prijava teme doktorske disertacije podnosi se NNV/UNV fakulteta/Akademije. Prijava sadrži:

- biografiju doktoranta;
- radni naslov doktorske disertacije;
- uži istraživački domen;
- metodološki pristup;
- ciljeve;
- detaljan pregled stanja u oblasti istraživanja u kojoj je tema definisana i očekivane naučne rezultate, odnosno umjetnički doprinos.

(2) Uz prijavu teme kandidat prilaže i dokaz da ima najmanje jedan naučni rad objavljen u Univerzitetskom registru domaćih publikacija, osim studija umjetnosti.

Član 29.

(1) Doktorska disertacija iz oblasti umjetnosti sastoji se od:

- umjetničkog djela ili izvedbe kod izvođačke umjetnosti (u daljem tekstu: umjetnički projekt);
- pismenog teorijskog rada kojim se elaborira proces nastanka, pretpostavljenih ciljeva i
- rezultata umjetničkog projekta.

(2) Umjetnički projekt mora biti visokog kvaliteta i ostvaren adekvatnim umjetničkim postupcima i sredstvima kojima se dokazuje uspješno vladanje umjetničkim tehnikama i mora biti vrijedno javnog izvođenja, izlaganja ili objavljivanja.

(3) Pismeni rad/teza mora potvrditi doktorantovu sposobnost korištenja i razumijevanja odgovarajućih istraživačkih metoda i mora dati tumačenje doktorskog projekta u teorijskom i kritičkom kontekstu.

Član 30.

(1) Na osnovu podnesene prijave NNV/UNV Organizatora studija predlaže Senatu Univerziteta sastav komisije za ocjenu podobnosti teme doktorske disertacije i kandidata.

(2) Senat Univerziteta, uz prethodno mišljenje Vijeća grupacije imenuje komisiju.

(3) Komisija iz stava 1. ovog člana ima 3 ili 5 članova, nastavnika koji imaju naučni stepen doktora nauka od kojih je većina iz naučne/umjetničke oblasti iz koje se prijavljuje tema.

(4) Jedan od članova komisije, u pravilu je sa drugog univerziteta.

(5) Jedan od predloženih članova komisije je i potencijalni mentor.

Mentor

Član 31.

(1) Mentor se određuje iz reda vanrednih i redovnih profesora, članova akademije nauka, te osoba u zvanju profesor emeritus iz uže naučne/umjetničke oblasti doktorske disertacije.

(2) Mentor na trećem ciklusu studija kao autor mora imati najmanje jedan naučni rad iz oblasti iz koje je mentor, objavljen u časopisima indeksiranim u međunarodnim naučnim bibliografskim bazama (CC, SCIE, SSCI, AHCI, ERIH, ECON LIT, MathSciNet (Mathematical Reviews)), osim studija umjetnosti.

(3) Za doktorsku disertaciju iz oblasti umjetnosti biraju se dva mentora: mentor za umjetnički projekat i mentor za doktorski rad kao dio doktorske disertacije. (4) Mentor na umjetničkom projektu je nastavnik u umjetničko-nastavnom zvanju redovnog profesora, a mentor za pisani dio rada je nastavnik u naučno-nastavnom zvanju vanrednog ili redovnog profesora.

(5) Po ukazanoj potrebi mentor može biti redovni/vanredni profesor koji kao autor ima najmanje tri naučna rada iz oblasti na kojoj je mentor, objavljena u drugim relevantnim časopisima. Mentor za izradu doktorske disertacije dužan je da pomaže studentu pri izboru metoda naučno-istraživačkog/umjetničko-istraživačkog rada, literature, pripremi strukture rada, kao i da mu pruža drugu stručnu pomoć.

(6) Mentor koji je preuzeo mentorstvo prije odlaska u penziju, ima pravo dovesti to mentorstvo do kraja.

Član 32.

(1) Komisija za ocjenu podobnosti teme i kandidata doktorske disertacije podnosi NNV/UNV Organizatora studija izvještaj o podobnosti teme i kandidata.

(2) NNV/UNV Organizatora studija utvrđuje prijedlog za usvajanje izvještaja i predlaže mentora.

(3) Na osnovu prijedloga NNV/UNV Organizatora studija i prethodnog mišljenja Vijeća grupacije, Senat usvaja izvještaj o podobnosti teme i kandidata doktorske disertacije. Nakon usvajanja izvještaja, NNV/UNV Organizatora studija, uz prethodnu saglasnost Senata imenuje mentora za izradu doktorske disertacije.

Postupak ocjene doktorske disertacije

Član 33.

(1) Doktorant je dužan dostaviti radnu verziju neuvezane doktorske disertacije u četiri primjerka sekretaru Vijeća.

(2) Uz disertaciju doktorant prilaže saglasnost mentora da se rad stavi u proceduru ocjene, kao i dokaz da je objavio ili da mu je prihvaćen najmanje jedan naučni rad iz oblasti teme doktorske disertacije kao uslov da može pristupiti odbrani doktorske disertacije.

(3) Relevantnim radom u smislu stava (2) ovog člana smatra se rad objavljen u međunarodnim časopisima indeksiranim u međunarodnim bibliografskim bazama, koje su date u Listi koja je sastavni dio ovog Pravilnika.

(4) Studijskom programom trećeg ciklusa studija može se suziti Lista baza iz stava 3. ovog člana do ažurirane Master Journal liste (Thompson Reuters).

(5) Ukoliko je doktorska disertacija iz oblasti umjetnosti sačinjena u formi notnog, tonskog, video ili digitalnog zapisa, ista se dostavlja u formi u kojoj je sačinjena, u četiri primjerka.

Član 34.

NNV/UNV Organizatora studija utvrđuje prijedlog komisije za ocjenu doktorske disertacije od 3 ili 5 članova od kojih je većina iz oblasti doktorske disertacije. Jedan od članova komisije, u pravilu je sa drugog univerziteta. Senat Univerziteta, uz prethodno mišljenje Vijeća grupacije imenuje komisiju za ocjenu doktorske disertacije.

Član 35.

(1) Komisija za ocjenu doktorske disertacije, nakon što rad pregleda, podnosi NNV/UNV organizatora studija pismeni izvještaj u roku koji ne može biti duži od 60 dana od dana imenovanja komisije. Komisija za ocjenu doktorske disertacije obavezna je u izvještaju navesti da je kandidat u toku dokorskog studija, iz oblasti teme doktorske disertacije, objavio ili da mu je prihvaćen najmanje jedan naučni rad u publikaciji utvrđenoj stavovima (3) i (4) člana 33. ovog Pravilnika.

(2) U Izvještaju komisija će predložiti da se doktorska disertacija prihvati, odbije ili vrati na dopunu, odnosno izmjenu.

(3) Ukoliko se doktorska disertacija vrati na dopunu, odnosno izmjenu, doktorant je dužan postupiti po odluci NNV/UNV Organizatora studija u roku od šest mjeseci od dana prijema odluke.

Član 36.

(1) U slučaju da NNV/UNV Organizatora studija vrati doktorsku disertaciju na dopunu, odnosno izmjenu, a doktorant u roku od šest mjeseci od dana prijema obavještenja o takvoj odluci ne postupi po primjedbama i sugestijama i ne dostavi dopunjenu doktorsku disertaciju, NNV/UNV Organizatora studija donosi odluku da je kandidat odustao od studija.

(2) U slučaju da NNV/UNV Organizatora studija odbije doktorsku disertaciju, kandidat gubi status studenta dokorskog studija, a prijavljena tema se registrira kao odbijena. Odbijenu temu doktorske disertacije kandidat ne može ponovo prijaviti.

Postupak odbrane doktorske disertacije/rada

Član 37.

(1) Nakon prihvatanja Izvještaja komisije o ocjeni doktorske disertacije, Senat Univerziteta, uz prethodno mišljenje Vijeća grupacije donosi odluku o imenovanju komisije za odbranu doktorske disertacije.

(2) Jedan od članova komisije, u pravilu je sa drugog univerziteta.

(3) Senat Univerziteta utvrđuje mjesto, dan i sat odbrane doktorske disertacije.

(4) Javna odbrana se organizuje u roku koji ne može biti kraći od 30 dana od dana imenovanja komisije.

(5) Komisija iz stava 1. ovog člana ima 3 ili 5 članova, od kojih je većina članova komisije koja je pregledala doktorsku disertaciju i iz naučne/umjetničke oblasti iz koje se brani doktorska disertacija.

(6) O javnoj odbrani doktorske disertacije, Sekretarijat Univerziteta obavještava javnost preko svoje oglasne table, oglasne table Fakulteta/Akademije i WEB stranice Univerziteta.

(7) Obavještenje o javnoj odbrani sadrži:

- ime i prezime doktoranta;
- naziv doktorske disertacije;
- mjesto i vrijeme odbrane disertacije
- sažetak doktorske disertacije.

Član 38.

(1) Javna odbrana doktorske disertacije pred komisijom ima sljedeći tok: Predsjednik komisije iznosi podatke i informacije o doktorantu, podatke o njegovim naučnim i stručnim radovima kao i podatke o ispunjavanju uvjeta za odbranu doktorske disertacije.

(2) Mentor daje kratki prikaz rada i čita izvod iz izvještaja komisije za ocjenu disertacije na osnovu čega je Senat prihvatio doktorsku disertaciju.

(3) Doktorant iznosi kraći rezime, rezultate i zaključke do kojih je došao, a nakon čega članovi komisije postavljaju pitanja.

(4) Javnoj odbrani iz oblasti umjetnosti (izvođačka umjetnost) prethodi javno izvođenje umjetničkog djela.

(5) Komisija za odbranu doktorske disertacije, nakon provedenog postupka, donosi odluku da li je doktorant odbranio ili nije odbranio doktorsku disertaciju.

(6) Predsjednik komisije saopštava odluku i javno proglašava rezultate odbrane.

(7) O toku javne odbrane doktorske disertacije vodi se zapisnik koji potpisuju članovi komisije i zapisničar. Sastavni dio zapisnika su pitanja postavljena doktorantu tokom odbrane disertacije.

(8) Doktorska disertacija je javna i može se objaviti nakon odbrane.

Član 39.

(1) Nakon uspješne odbrane doktorske disertacije kandidat je dužan u roku od mjesec dana uvezati rad i predati u dovoljnom broju uvezanih primjeraka doktorske disertacije. Po jedan primjerak rada pripada: Narodnoj i univerzitetskoj biblioteci u Tuzli, fakultetskoj biblioteci, članovima komisije, Sekretarijatu Organizatora studija, odnosno Univerziteta, po jedan primjerak ostalim ustanovama shodno Zakonu o bibliotečkoj djelatnosti.

(2) Prije korićenja disertacije, kandidatu se, u potrebnom broju primjeraka dostavlja odluka o odbrani disertacije. Odluka se u pravilu uvezuje ispred sadržaja.

V. DIPLOMA

Član 40.

(1) Diplomom doktora nauka/umjetnosti stiče student koji je položio sve ispite utvrđene nastavnim programom doktorskog studija i odbranio doktorsku disertaciju na način propisan Statutom Univerziteta i ovim Pravilnikom.

(2) Uz diplomu se izdaje i dodatak diplomi koji sadrži detaljan uvid u nivo, prirodu, sadržaj, sistem i pravila studiranja i postignute rezultate tokom studija.

VI. PRELAZNE I ZAVRŠNE ODREDBE

Član 41.

(1) Ovaj Pravilnik stupa na snagu osmog dana od dana objavljivanja na oglasnoj tabli i WEB stranici Univerziteta a primjenjivat će se od akademske 2011/2012.godine.

(2) Ako neki od fakulteta/Akademija stekne uslove da i prije roka iz stava 1. ovog člana organizuje doktorski studij, ovaj Pravilnik će se primjenjivati od dana sticanja tih uslova, a nakon stupanja na snagu ovog Pravilnika.

(3) Odluku iz stava 2. ovog člana donosi Senat Univerziteta.

Član 42.

Prečišćeni tekst Pravilnika obuhvata:

- Pravilnik o izmjenama i dopunama Pravilnika o trećem ciklusu-doktorskom studiju na Univerzitetu u Tuzli broj: 03-8435-3.1/13 od 06.11.2013. godine;
- Pravilnik o trećem ciklusu-doktorskom studiju na Univerzitetu u Tuzli (Prečišćeni tekst) broj: 03-8435-3.2/13 od 06.11.2013. godine;
- Pravilnik o izmjenama i dopunama Pravilnika o trećem ciklusu-doktorskom studiju na Univerzitetu u Tuzli broj: 03-2926-9/15 od 27.05.2015. godine;
- Pravilnik o izmjenama i dopunama Pravilnika o trećem ciklusu-doktorskom studiju na Univerzitetu u Tuzli broj: 03-421-4/16 od 25.01.2016. godine;
- Pravilnik o izmjenama i dopunama Pravilnika o trećem ciklusu-doktorskom studiju na Univerzitetu u Tuzli broj: 03-8373-3/16 od 07.12.2016. godine;
- Pravilnik o izmjenama i dopunama Pravilnika o trećem ciklusu-doktorskom studiju na Univerzitetu u Tuzli broj: 03-9065-2/16 od 21.12.2016. godine;
- Pravilnik o izmjenama i dopunama Pravilnika o trećem ciklusu-doktorskom studiju na Univerzitetu u Tuzli broj: 03-1012-4/17 od 20.02.2017. godine.

UNIVERZITET U TUZLI

SENAT

Broj: 03-2351-1-5/20

Tuzla, 29.05.2020. godine

PREDSJEDAVALA SENATA

Dr. sci. Nermina Hadžigrahić, red.prof